



15. Tschanteda da la suprastanza cumünela in marculdi, ils 12.10.2016 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott (a partir da tractanda 131), Paolo Bernasconi, Liun Quadri

Absaints: Jnes Barblan, Gian Andrea Bott (fin tractanda130)

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 2.100 Revisiun parziela reglamaint structuras dal di, artichel 3
4. 6.200 Dumanda Christian Cordett regard catramer la via da quartier Serlas
5. 8.300 Neves Susanna, dumanda per pudair gestiuner ün char da restoraziun in vicinanza da la loipa / liftin
6. 6.210 Nouv contrat pels parkegis publics tar la staziun Cinuos-chel cun la Viafier Retica
7. 0.209 Cunvegna cun Joos Simon Salzgeber e las vschinaunchas da S-chanf e Zuoz regard l'oblig da cumprer minimel 1'500 m³ laina per la gestiun dal s-chudamaint a distanza per ün predschi minimel
8. 2.100 Surdeda da lavuors projectuors audiovisuels per la scoula
9. 0.700 Surdeda furniziun e montascha d'üna nouva tenda pel palc
10. 9.999 Varia

La glista da tractandas vain approveda cun metter inavous la tractanda 5, adonta cha la suprastanza chatta quella üna bun'ideja, ma displaschaivelmaing mauncha l'acconsentimaint dal possessur da terrain. Impü decidan il preschaints da piglier tiers la tractanda dumanda da la Confederaziun regard cumprita chamannas Fuorcla Trupchun e Pass dal Chaschauna, our da motivs chi'd es gnieu miss ün termin per der resposta.

Protocol: Il protocol da la tschanteda dals 05.10.2016 vain approvu.

**129 0.211 Dumanda da fabrica
Zavanelli Fiorina, dumanda da prolungiaziun permiss da fabrica
dals 11.11.2015**

La suprastanza piglia cugnuschentscha da la dumanda da Fiorina Zavanelli per prolunger il permiss da fabrica dals 11.11.2015. Our da motivs da sandet nun ho pudieu gnir

cumando a temp la fabrica. Zieva cuorta discussiun decida la suprastanza unanimamaing da conceder la dumanda e da prolunger il permiss da fabrica fin ils 11.11.2017.

130 2.100 Scoula primara
Revisiun parziela reglamaint structurals dal di, artichel 3

Tenor il reglamaint da las structurals dal di paun gnir annunzchos iffaunts per las spüertas da la scoula da di adüna la fin da lügl pel prüm semester e la mited da schner pel seguond semester da l'an scolastic. Il cussagl da scoula ho discus che consequenzas cha que vess, sch'üna famiglia gniss ad abiter a S-chanf düraunt l'an da scoula e vess dabsögn da las structurals dal di. Il cussagl da scoula fo la proposta, cha'l passus seguaint gniss agiunt in l'artichel 3 dal reglamaint da las structurals dal di:

Sch'üna famiglia vain ad abiter a S-chanf düraunt l'an da scoula ed annunzcha a lur iffaunt(s) per las structurals dal di e que vess cun quistas novas annunzchas d'avair almain 4 iffaunts per ün'united, schi vain quist'united spüerta. La mnedra / il mneder da scoula u/e la respunsabla / il respunsabel per las structurals da di infurmess in quist cas a tuot ils genituors per garder, sch'eir oters genituors vessan interess per quista(s) lecziun(s).

Zieva cuorta discussiun decida la suprastanza unanimamaing d'agiundscher l'artichel 3 cul passus proponieu dal cussagl da scoula.

131 6.200 Vias e plazzas cumünelas
Dumanda Christian Cordett regard catramer la via da quartier Serlas

Christian Cordett ho l'intaunt da catramer prosmamaing la piazza davaunt la nouva chesa/ufficina scu eir l'access da la garascha sün parcella nr. 658 in Serlas. Our da quel motiv fo'l la dumanda, scha la vschinauncha vless güst catramer inavaunt la via d'access fin tal suotpassagi da la via chantunela. Ad es avaunt maun ün'offerta per quella lavur e'ls cuosts muntan a fr. 21'852.80. Zieva cuorta discussiun decida la suprastanza unanimamaing d'effettuer las lavuors a medem temp scu'l patrun da fabrica e l'import vain miss a quint al plan da quartier Serlas chi dess prosmamaing gnir serro gio. La via dess gnir catramada be fin tar l'entreda da la parcella nr. 658, na scu propost fin tal suotpassagi ed unic il terrain public.

132 6.210 Parkegis publics
Nouv contrat pels parkegis publics tar la staziun Cinuos-chel cun la Viefier Retica

La fin da l'an 2015 s'ho spusto il deposit d'immundizchas tal Plaun Grand a Cinuos-chel. Our da quel motiv s'ho inoltro la desditta dal contrat chi d'eira gnieu stipulo a sieu temp cumbino pel deposit scu eir pels parkegis. Las trattativas intensivass culs respunsabels da la Viefier Retica haun purto, cha'l fit es gnieu sbasso considerabel. Uossa es avaunt maun üna proposta d'ün nouv contrat chi cumainza retroactiv süls 01.09.2016. La Viefier Retica do a fit a la vschinauncha ils parkegis scu eir l'access da quels per fr. 2'000.00 l'an. Il mantegniment e la rumida da naiv scu eir las entredgias da las uras da parker vaun a charg da la vschinauncha. La vschinauncha es respunsabla per la sgürezza e las controllas. Ün preschaint fo la proposta da sbasser il fit sü'l nivel da las entredgias da l'ura da parker. Zieva annimada discussiun decida la suprastanza cun 3 cunter 1 vusch d'accepter il contrat preschaint scu propost dal cuntrehent, eir per sgüerer il futur da la staziun activa a Cinuos-chel.

133 0.209 Contrats e cunvegna
Cunvegna cun Joos Simon Salzgeber e las vschinaunchas da S-chanf e Zuoz regard l'oblig da cumprer minimel 1'500 m³ laina per la gestiun dal s-chudamaint a distanza per ün predschesch minimel

La vschinauncha da Zuoz ho l'intenziun da collier il quartier resgia a Zuoz cul s-chudamaint a distanza da Joos Simon Salzgeber. Our da quel motiv s'ho eir decis da stipuler üna cunvegna traunter las vschinaunchas da Zuoz e S-chanf, causa la collavuraziun i'l sector forestel, e Joos Simon Salzgeber. La cunvegna prevezza, cha Joos Simon Salzgeber ho da retrer minimelmaing 1'500 m³ s-chalizzas pel s-chudamaint per scorza fr.5.00, per ramma masdeda fr. 7.50, e per laina cun scorza fr. 18.00 per m³. Ils predschs s'inclegian inclus il sfender e preparar in üna bagnoula. Zieva animeda discussiun decida la suprastanza da formular pü in detagl la cunvegna preschainta, culs adattamaints, cha la vschinauncha do liber la laina chi sto a disposiziun per vender e cha'l contrahent nun dess avoir il dret da decider in chosa e'ls predschs d'essan gnir indexos. Zieva chi vegnan fats ils adattamaints dess la cunvegna gnir suottamissa per üna segunda lecziun.

134 2.100 Scoula primara
Surdeda da lavuors projectur audiovisuel per la scoula

Per la furniziun e l'installaziun dad 1 projectur audiovisuel per la scoula primara s'ho trat aint offertas. Resguardant il post previs i'l preventiv decida la suprastanza unanimamaing da surder la lavur e la furniziun a la firma Koller SA da Zuoz pel predschesch offert da fr. 4'490.65, inclus l'imposta sülla püvalur. Tar la surdeda s'ho resguardo l'offerta economicamaing la pü favuraivla.

135 0.700 Stabels d'administraziun
Surdeda furniziun e montascha d'üna nouva tenda pel palc

Las tendas dal palc da la sela polivalenta sun in ün nosch stedi ed haun eir üna tscherta eted. Our da quels motivs s'ho trat aint offertas per rimplazzer quellas. Zieva cuorta discussiun decida la suprastanza unanimamaing da surder la furniziun e la montascha da la nouva tenda a la firma Rolf Camichel da Samedan pel predschesch offert da fr. 18'200.00, inclus l'imposta sülla püvalur. Tar la surdeda s'ho resguardo l'offerta economicamaing la pü favuraivla.

136 9.420 Stabels da la faculted finanzia
Interest da surpiglier immobiglias sün terrain cumünel

La suprastanza piglia cugnuschentscha da la dumanda da la Confederaziun regard las immobiglias militeras sün Fuorcla Trupchun e'l pass Chaschauna, scha la vschinauncha ho interest da surpiglier quellas. Las cundiziuns, aunz cu pudair surpiglier quellas sun, cha'l cumprender ho da fer il müdamaint d'utilisaziun leghel tenor ledscha da planisaziun chantunela. Zieva cuorta discussiun decida la suprastanza unanimamaing da comunicher l'interest e giavüscha cha las trattativas vegnan fattas bain svelt.

137 9.999 Varia

Il president orientescha, cha l'antieriur contabel e chanzlist Patrice Mayer es pront d'interrumper e gnir inavous da sieu viedi intuorn il muond ed es pront da surpiglier ad interim la piazza da chanzlist, fin chi s'ho chatto ün nouv chanzlist.

La suprastanza piglia cugnuschentscha da la decisiun da la Regenza in connex cun la zona d'hotels. La Regenza ho accepto ils plaunts dals proprietaris da las 2 zonas d'hotel. Ils sclarimaints giuridics intensivs in seguit haun demusso, cha las schanzas sun minimas per fer ün plaunt al güdisch administrativ, causa la nouva ledscha federela.

A las 20.30 vain la tschanteda alveda.

In buna fè

L'actuar:
D. Schwenninger